

Kenaikan Pangkat Merupakan Satu Penghargaan dan Pengiktirafan Kepada Guru dan Anggota Kumpulan Pelaksana



Labuan – Seramai 38 orang warga Jabatan Pendidikan menerima surat Kenaikan pangkat Time-Based Berasaskan Kecemerlangan yang terdiri daripada 18 orang Pegawai Perkhidmatan Pendidikan (PPP) Gred DG41 ke Gred DG44, 8 orang PPP Gred DG34 ke Gred DG38, 3 orang Pembantu Tadbir (P/O) Gred N19 ke N22 dan 7 orang Pembantu Pengurusan Murid Gred N19 ke Gred N22. Di samping itu, 2 orang Pembantu Operasi Gred N11 dinaikkan pangkat ke Gred N14 secara *one off*.

Majlis Penyerahan Surat Kenaikan Pangkat Jabatan Pendidikan Wilayah Persekutuan Labuan telah diadakan pada 29 Oktober 2019 bertempat di Jabatan Pendidikan , WP Labuan,

Kompleks Ujana Kewangan.

Sebelum ini kumpulan Pegawai Perkhidmatan Pendidikan Gred DG48 hingga DG54 telah menerima surat kenaikan pangkat mereka yang telah disampaikan oleh YBrs. Tuan Mohamad Azhan bin Md. Amir, Timbalan Ketua Setiausaha (Pengurusan) pada 10 Oktober 2019.

Pengarah Pendidikan Jabatan Pendidikan WP Labuan, Encik Raisin Saidin memaklumkan berikutan penstrukturan semula Jabatan, terdapat perjawatan baharu yang telah diwujudkan atas gred kenaikan pangkat. Kenaikan pangkat merupakan pengiktirafan terhadap kerja buat sepanjang berkhidmat sebagai penjawat awam.

Beliau mengucapkan syabas dan tahniah kepada para guru serta anggota kumpulan pelaksana yang menerima surat kenaikan pangkat dan berharap ianya menjadi pemangkin semangat untuk meningkatkan prestasi masing-masing.

Beliau menaruh kepercayaan yang tinggi bahawa warga Jabatan Pendidikan Wilayah Persekutuan Labuan di segenap lapisan akan terus bersama-sama berusaha memberikan perkhidmatan berimpak tinggi dengan cemerlang dan berintegriti serta melaksanakan penambahbaikan secara berterusan demi melahirkan modal insan yang berkualiti.

**SUNTIKAN MOTIVASI MENJELANG
SPM : Majlis Graduasi**

Tingkatan Lima SMK Labuan



Labuan – SMK Labuan telah mengadakan Majlis Graduasi Tingkatan Lima di Dewan Mutiara SMK Labuan pada 24hb Oktober yang lalu.

Pada majlis itu, seramai 242 orang pelajar tingkatan lima menerima sijil dan memberi suntikan kepada semua pelajar yang bakal menduduki peperiksaan SPM 2019.

Pelajar Kelas 5 Jujur, Rubenraj A/L Nanda Kumar menerima Anugerah Khas Murid Terbaik selepas memperolehi keputusan Peperiksaan Percubaan SPM 3A+, 3A, 3A(Gred Purata 1.00).

Anugerah Khas turut diberikan kepada tujuh orang murid iaitu masing-masing tiga murid kelas 5 Amanah dan empat murid 5 Berkat (berpencapaian rendah) yang lulus dalam Peperiksaan Percubaan SPM iaitu Gleen Ford John (5 Amanah), Rosnalin (5 Amanah), Mohd Haqimie Md Fauzi (5 Amanah), Andi Sutra Mohd Aris (5 Berkat), Muhd Rahiemi Syah Rahmad (5 Berkat), Nurul Alis Natasha (5 Berkat) dan Nursyafika (5 Berkat).

Majlis telah dirasmikan oleh Pengerusi Perbadanan Labuan,

merangkap Bapa Angkat Korporat SMK Labuan, Dato' Sri Haji Amir Hussien.

Menyentuh mengenai generasi belia tonggak negara pada masa hadapan, Dato' Sri Haji Amir menyeru murid-murid agar melengkapkan diri dengan pelbagai kemahiran. Kemahiran-kemahiran seperti kemahiran komunikasi di hadapan umum, kemahiran bersosial dan sebagainya perlu dikuasai untuk menambahkan keyakinan diri kerana seseorang pemimpin perlulah mempunyai keyakinan diri dalam menjalankan tugas mereka. Dengan itu, mereka akan sentiasa disanjung dan dihormati oleh masyarakat yang dipimpin oleh mereka.

Dato' Sri Haji Amir berkata Labuan memerlukan generasi terpelajar yang bukan sahaja menguasai ilmu dan berkemahiran tinggi malahan memiliki dan mengamalkan sikap serta nilai-nilai positif untuk memajukan diri serta memakmurkan negara.



Sebahagian Murid Tingkatan 5 yang hadir dalam Majlis Graduasi

Sementara itu Pengetua Encik Ismail Abdullah berkata, Majlis Graduasi Tingkatan 5 dilaksanakan untuk memberi satu suasana yang menggembirakan dan akan menjadi

kenangan persekolahan menengah bagi murid-murid yang menyertai majlis berkenan pada tahun ini.

Encik Ismail berkata, murid-murid mesti sentiasa ingat tentang sasaran pencapaian yang ditetapkan kepada sekolah untuk dicapai, iaitu 100 peratus murid layak mendapat sijil SPM, yang bermakna mereka mesti lulus atau menguasai sekurang-kurangnya untuk mata pelajaran Bahasa Melayu dan Sejarah.

“Semoga majlis ini akan meningkatkan semangat murid-murid untuk mencapai sesuatu dalam SPM mengikut keupayaan masing-masing sebelum meninggalkan alam persekolahan menengah,” katanya sambil merakamkan ucapan penghargaan kepada semua guru SMK Labuan.

Majlis yang bermula jam 8.30 pagi itu turut dihadiri Pengetua SMK Labuan Ismail Abdullah, Yang Dipertua PIBG SMK Labuan Tuan Haji Md Yusof Haji Chuchu, Penolong Pengarah Sektor Pembelajaran Jabatan Pendidikan Wilayah Persekutuan Labuan Puan Murni Jaafar dan Penolong Kanan Pentadbiran SMK Labuan Puan Zalina Zunkepely.

Hadir sama Ustazah Marziawati Mardan (PK HEM), Encik Cheah Teong Aik (PK Kokurikulum), Encik Saminan Sabtu (PK Pusat Tingkatan Enam) dan Encik Kitli Beka (PK Petang), guru-guru kanan bidang dan guru-guru.

Berita Oleh : SMK Labuan



Rubenraj bersama ayah



Sofia bersama ibu bapa